

**GARIS PANDUAN UNTUK YURAN PEMROSESAN CEK**  
**DITERBITKAN OLEH PERSATUAN BANK-BANK DALAM MALAYSIA**

**1. Yuran pemprosesan cek yang dikenakan**

- 1.1 Berkuatkuasa 2 Januari 2015, yuran pemprosesan cek 50 sen akan dikenakan setiap kali cek diterima oleh pihak bank untuk pemprosesan, sama ada ketika menunaikan cek di kaunter bank atau sewaktu cek didepositkan ke dalam akaun.
- 1.2 Yuran pemprosesan cek tersebut adalah tambahan kepada duti setem yang dikutip oleh pihak bank.

**2. Pihak yang akan menanggung yuran pemprosesan cek**

Yuran tersebut akan dikenakan ke atas pengeluar cek atau akaun beliau.

**3. Cek jurubank / draf bank / perintah juruwang**

Jika ia melibatkan cek jurubank / draf bank / perintah juruwang, contohnya cek yang dikeluarkan oleh bank, pemohon cek jurubank / draf bank / perintah juruwang perlu membayar yuran pemprosesan cek pada waktu permohonan. Yuran pemprosesan cek tersebut adalah tambahan kepada duti setem dan komisen yang dikutip oleh pihak bank.

**4. Cek dikembalikan belum berbayar**

- 4.1 Secara amnya, sekiranya sesuatu cek dikembalikan belum berbayar, yuran pemprosesan cek tidak akan dipulangkan dan tetap akan dikenakan bayaran.
- 4.2 Ini termasuk bagi cek dengan tarikh kehadapan yang dikemukakan oleh penerima cek sebelum tarikh cek. Pengeluar cek akan tetap dikenakan yuran pemprosesan cek.
- 4.3 Namun, yuran pemprosesan cek akan dipulangkan sekiranya cek dikembalikan belum berbayar disebabkan oleh kesilapan yang dibuat oleh pihak bank yang berkenaan, contohnya apabila pihak bank silap mengembalikan cek yang boleh digunapakai.

**5. Cek yang dikemukakan semula**

Pengeluar cek akan dikenakan yuran pemprosesan sekali lagi apabila cek tersebut dikemukakan atau setiap kali ianya dikemukakan, sekiranya ianya berlaku lebih dari sekali.

**6. Kekerapan kutipan yuran pemprosesan cek**

Pihak bank berhak menetapkan bila yuran pemprosesan cek itu akan dikutip, sama ada atas dasar satu cek ke satu cek atau secara berkelompok pada akhir hari perbankan atau setiap bulan dengan syarat notis awal yang sewajarnya diberi kepada pelanggan-pelanggan.